

四庫全書

子部

欽定四庫全書

子部

潛邱劄記卷三

詳校官中書臣王鵬

員外郎臣牛稔文覆勘

總校官檢討臣何思鈞

校對官中書臣胡敏

謄錄監生臣曹祖循

欽定四庫全書

潛邱劄記卷三

山陽閻若璩撰

史記索隱曰崔浩云勃旁跌也旁跌出者橫在濟北故
齊都賦云海旁出為勃名曰勃海郡

分野之說古人每詳言之周禮保章之職既難考論而
見於左氏內外傳者猶可類推也武王克商歲在鶉火
故伶州鳩曰歲之所在我周之分野也則鶉火為周分

矣晉文即位歲受實沈故董因曰晉人是居則實沈為
晉分矣襄二十八年歲淫元枵禍衝於鳥尾周楚惡之
則鶉尾為楚分矣昭十七年星見大辰梓慎知宋鄭之
災曰宋大辰之虛也則大火為宋分矣獨其說有可疑
者星紀北而吳越南井鬼南而秦居西虛危在北齊表
東海降婁屬西魯宅曲阜或以受封之始歲星所在
為說然有絕而復續者封日既異前星又豈可據乎夫
春秋戰國地域變遷三晉未分晉當何區秦拔西河魏

當何屬周末東遷何故已直鷄火陳滅於楚何自而入
韓分且中國幾何蠻夷戎狄豈日星所不臨哉天道在
西北而晉不害越得歲而吳受其凶皆以所在言之也
然豕韋實衛晉何以吉吳越同野吳何以凶衛既水屬
何故與宋鄭同火裨竈先知之顓頊之虛姜氏任氏實
守其祀是又齊薛之分矣此皆不可曉者前哲要自有
見也

春秋隱公九年冬公會齊侯于防杜註防魯地在琅邪

縣東南十年六月辛巳取防註高平昌邑縣西南有西
防城宋邑鄭取以歸於我莊公七年春夫人姜氏會齊
侯于防註防魯地二十有九年冬十有二月城諸及防
註諸防皆魯邑諸今城陽縣僖公十有四年夏六月季
姬及鄆子遇于防使鄆子來朝註鄆國今琅邪鄆縣
鄭樵好說中原山川後識者見之云全不是

東匯澤為彭蠡鄭樵以為多此一勾朱子取之云禹治
水時想亦不曾徧歷天下如荊州乃三苗之國不成禹

一一皆到往往是使官屬去彼相視其山川具其圖說以歸然後作此一書爾故今禹貢所載南方山川多與今地面上所有不同

趙順孫孟子纂疏曰滕國在漢沛郡公邱縣東南薛國即漢魯國薛縣與滕相密邇

密國在今寧州阮國在今涇州其阮地今有共池侵阮徂共蓋侵阮直至共之地也

方十里者以開方法計之為九百夫方百里者以開法

計之為九萬夫

傳寅同叔禹貢集解曰禹之治水皆自下而上曰治水者必使其下能容而有餘易泄而無礙然後可以安受上流而不至於衝激以生怒又曰治其最下而速其行通其旁流而使其其中無停積之患則河之大體無足憂矣

蔣鳴玉曰川西皆岷岷北流為洮入黃河南流入川為大江此知岷峩總是一山只橫障西南二處為異耳今

江水果隨岷峩至嘉眉直下中間如雋州之大渡沫水
夾江之青衣捷為之漢水無不湊集至嘉定為一都聚
合之禹貢岷山導江一語地勢愜合

漢水
記考

趙氏德曰轉附作轉鮒屬萊州

張方平曰國家都陳留當四通五達之道非若雍洛有
山川足恃倚重兵以立國耳後蒙古取襄鄧入漢濟江
長驅南下多用郝經策得宋之奏議周知其形勝要害
與其守禦之策用其所保反而攻之我無借箸聚米之

勞而彼之地圖兵畧皆轉而授於我矣此亦後事之師不可以不戒也

宋史地理志楚州淮陰縣嘉定七年徙治八里莊

程大昌曰東嶠至西嶠三十五里皆在秦關之東漢關之西

隋大業改漢津縣曰漢陽寰宇記云以在漢水之南章山之陽故名

雲梯關海口濶處凡十四五里或七八里安東而上大

約二三里此即禹貢以來淮水入海之道也

說文云陶再成邱也在濟陰夏書曰東至于陶邱陶邱有堯城堯嘗所居故堯號陶唐氏

元史地理志元起朔漠併西域平西夏滅女真臣高麗定南詔遂下江南而天下為一故其地北踰陰山西極流沙東盡遼左南越海表蓋漢東西九千三百二里南北一萬三千三百六十八里唐東西九千五百一十一里南北一萬六千九百一十八里元東南所至不下漢

唐西北則過之有難以里數限者矣

臨川朱思本曰大概河源東北流所歷皆西番地至蘭州凡四千五百餘里始入中國又東北流至邊外地凡二千五百餘里始入河東境內又南流至河中凡一千八百餘里通計九千餘里

郭璞註山經泰陸之水曰大陸水今鉅鹿北廣平澤即其水

郭氏註岷山為大江所出崃山為南江所出岨山為北

江所出

山海經曰岷三江首又曰大江出汶山北江出曼山南
江出高山郭注今江出汶山郡升遷縣岷山至廣陵郡
入海

汶山即岷山字異義
同見史記夏本紀

郭氏曰白水在梓潼白水縣源從臨洮之西西傾山來
經沓中東流通陰平至漢壽縣入潛

禹貢之水有散見於一州而復總見於導水條者渭與
洛是也所以陳氏櫟于導渭自鳥鼠同穴曰灋涇漆沮

皆入渭渭入河東會于澧即澧水攸同也東會于涇即
涇屬於渭汭也東過漆沮即漆沮既從也澧涇大與渭
並故曰會既得澧涇渭愈大漆沮皆小故曰過前分言
於雍而自源祖流言于此也新安陳氏于導洛自熊耳
曰此即豫州伊洛澠澗之源流也澗澠伊皆入洛而洛
入河耳又有散見上文各州而復總結於末者九州攸
同六句是也所以陳氏大猷曰禹貢書法簡嚴經于每
州惟舉一隅至此總結之以見九州之所同如宅土惟

言于究雍故此以四隩既宅總之旅山惟言於梁雍故
此以九山刊旅總之經所載之川澤雖多然九州之川
澤不止是也故以九州九澤之滌陂總之經雖各載達
河之道而四方之趨帝都者不止是也故以四海會同
總之

蔡傳豫州去帝都最近豫之東境徑自入河豫之西境
則浮于洛而後至河也案豫州東境并無河惟北境有
之當改東境作北境以上與荊州至于南河合豫州本

金史卷之三
卷三
傳北距大河合蔡氏每自忘前語何邪

書傳會選既修太原下引朱子曰從太原至岳陽皆修之也他所舉山川皆先地後績者觀成功而言也壺口梁歧太原皆先績後地者本用功之始而言也豈治有難易歟恒衛既從又引東萊呂氏曰言水土平於田賦之前者其害大當先治之也言于田賦之後者其害小徐治之也並當採入集傳

張說郭震行狀云初安西南有毒河源遠在葱嶺西北

河岸百步人畜踏之者輒死公威振西域所向無不從者因驗圖經知其源率兵三萬人厯于闐康居大食等國所過之國令供資糧仍署其國王為左右總管率兵前進北至葱嶺牙帳前十二國王兵百餘萬其河源上有大樹高千餘尺垂蔭數頃大軍至日有黃龍繞樹以口吐毒氣而拒官軍三軍悉覩焉公手書檄文令左拾遺張宣抗聲讀之畢黃龍解樹而下公率諸軍誅之數日方倒聚而焚焉河源且絕數十里內悉為良田

王少伯出塞詩但使龍城飛將在徧閱文苑英華凡十數本並同惟宋槧本王荆公百家詩選龍作盧或者頗以為疑來質余余曰盧是也李廣為右北平太守匈奴號曰飛將軍避不敢入塞右北平唐為北平郡又名平州治盧龍縣唐時有盧龍府盧龍軍杜氏通典盧龍塞在縣西北二百里其土色黑山如龍形故名若龍城見漢書匈奴傳五月大會龍城祭其先天地鬼神崔浩曰西方胡皆事龍神故名大會處為龍城所以唐實威出

塞潛軍度馬邑揚旆捲龍城楊炯從軍行牙璋辭鳳闕
鐵騎繞龍城沈佺期雜詩誰能將旌鼓一為取龍城即
王少伯又從軍行去為龍城戰正直胡兵襲則龍城明
明屬匈奴中豈得冠於飛將上哉龍城一名龍庭班
固燕然山銘躡冒頓之區落焚老上之龍庭註曰龍庭
單于祭天所是也或曰宋槩本竟如是莫可擬議乎余
曰亦不然如謝朓據南史改作朏耿緯據唐書改作緯
萊州據李頎集則作蔡州滄涯縣據通典則作涯他尚

不可勝數善乎顏介有言校定書籍夫何容易自劉向
揚雄方稱此職世豈有劉揚其人者乎要事求有據不
敢憑臆以決亦可矣

通典山陽漢射陽縣地晉立山陽郡或云漢吳王濞反
於廣陵山陽王率衆於此拒之因以山陽為名按漢有
兩山陽王一元帝之子名康魯徙為山陽王既與吳楚
反時絕不相及一梁孝王之子名定景帝中六年立為
山陽王亦後于吳楚之反者十年蓋吳楚反梁孝王以

兵捍之孝王在諸子固未嘗王孝王歿景帝始順太后
意分梁地為五而盡立其諸子吳王濞初起兵于廣陵
西涉淮並將楚兵破梁于棘壁乘銳而前固未聞有人
拒之於射陽者且射陽亦非梁所屬安得定於此拒之
邪

通鑑元狩元年驃騎將軍去病深入二千餘里四年驃
騎將軍出代右北平二千餘里太初二年浚稽將軍趙
破奴出朔方西北二千餘里本始二年田廣明范明友

韓增趙充國田順期以出塞各二千餘里無至三千里者東漢永元元年竇憲耿秉至出塞三千餘里登燕然山永元三年憲欲滅匈奴遣耿夔任尚破北單于於金微山出塞五千餘里而還自漢出師未嘗至也兩漢追匈奴有里數者僅此宋史韓世忠列傳初世忠謂敵至必登金山廟觀我虛竇迺遣兵百人伏廟中百人伏岸澗約聞鼓聲岸兵先入廟兵共擊之金人果五騎闖入廟兵喜先鼓而出僅得二人逸其三中有絳袍玉帶既墜而復馳者詰之乃

烏珠也按續資治通鑑綱目宋元通鑑金山之下廟之上並有龍王二字曾親至其地疑之當時烏珠軍江南太乙貝勒軍江北韓世忠以海艦泊金山下烏珠不得絕江豈能輕騎至龍王廟且既覺而復能浮江去耶或曰當時有沙洲故諺云金烏珠騎馬上金山此尤無稽之談也昔在崑山輯

大清一統志至鎮江府得舊本三山志載龍王廟北宋時在銀山上非金山也然後知修宋史者以其時龍王

廟在金山故實以金山而不知於兵機地形失之遠矣
大清一統志大清河在厯城縣北自齊河縣流入又東北
入濟陽縣界其上流即古濟水也小清河在厯城縣北
即古濼水也臣按自漢至隋唐惟有濟水杜佑始有清
河之名宋南渡後始有大小清河之分于欽齊乘以大
清為古濟水而以小清為劉豫所導後人皆沿其說其
實非也以水經注元和志寰宇記諸書考之濟水最南
濼水在中河水最北今者小清所經自厯城以東如章

邱鄒平長山新城高苑博興樂安諸縣皆古濟水所行而大清所經自厯城以上至東阿固皆濟水故道而自厯城東北如濟陽齊東青城諸縣則皆古漯水所行蒲臺以北則古河水所經蓋唐宋時河行漯川其後大清兼行河漯二川其小清所行則斷為濟水故道也

淮安府清河縣臣按清河有三一曰清泗今縣所取名一曰清濟在今山東東平州界一曰清淇在今直隸廣平府界即古清河郡也

宋史河渠志熙寧十年七月乙丑河大決於澶州曹村
澶淵北流斷絕河道南徙東匯于梁山張澤灤分為二
派一合南清河入于淮一合北清河入于海凡灌郡縣
四十五而濮齊鄆徐尤甚壤田逾三十萬頃

元和志兗州乾封縣汶水源出縣東北原山西南流經
縣治南去縣三里又有北汶羸汶柴汶牟汶述征記曰
泰山郡水皆名汶按今乾封縣界凡有五汶皆源別而
流同也

金史河渠志都水監田櫟上言前代每遇古堤南決多經南北清河分流南清河北下有枯河數道河水流其中者長至七八分北清河乃濟水故道可容二三分而已

元史河渠志賈魯嘗言用物之效草雖至柔柔能狎水水漬之生泥泥與草并力重如硃然維持夾輔纜索之功實多

宋史河渠志徽宗宣和三年詔曰江淮漕運尚矣春秋

時吳穿邳溝漢吳王濞開邳溝通道海陵隋開邳溝自
山陽至揚子入江

王宗沐曰海州東海口在州東一十五里黃淮之正流
於此入海安東縣張網海口在縣東北一百二十里黃淮
之支流於此入海

金史食貨志黃河已移故道梁山灤水退地甚廣遣使
安置屯田自是為平陸矣今東平州西十八里有積水
湖尚其遺跡

鉅野縣東五里有大野澤今涸為平陸其東偏為南旺湖在汶上縣

水經注汶水西南逕桃鄉縣故城西世所謂鄆城也按汶上縣東北四十里有桃城在汶水南東平州東七十里有鄆城在汶水北酈氏合而一之非也

黃宗義今水經序曰余越人也以越水證之以曹娥江為浦陽江以姚江為大江之奇分苕水出山陰縣具區在餘姚縣沔水至餘姚入海皆錯誤之大者

河水源出吐蕃朶甘思之南曰星宿海又名火燉腦兒
其地在中國西南直四川馬湖府之正西三千餘里雲
南麗江府之西北一千五百里較之崑崙胡名騰乞里
塔者殆為近焉

天下之潮皆一日兩汎惟瓊海之潮半月東流半月西
流潮之大小隨長短星不係日之盛衰

郭璞山海經注曰諸水所出又與水經違錯以為凡山
川或有同名而異實或同實而異名或一實而數名似

是而非似非而是且歷代久遠古今變易語有楚夏名號不同未得詳也

景范湖廣總論曰以天下形勢言之則重在襄陽以東南形勢言之則重在武昌以一省之勢言之則重在荊州

龍門山在韓城縣東北八十里與山西河津縣分界北魏志梁山北有龍門山故龍門亦兼梁山之稱隋大業十三年李淵遣王長諧等自梁山濟營于河西以待大

軍即龍門也

黃河在韓城縣東五十里自延安府宜川縣流入境厯
龍門口而下有禹門渡通山西河津縣寰宇記龍門山
北有河口畧似龍門而不能通相傳鯀治水時所鑿績
用弗成今名錯開河

龍門關在韓城縣東北龍門山後周時所立最為臨阨
或云關之下即禹門渡

舊唐書禮儀志天寶十載正月遣潁王府長史甘守默

祭霍山應聖公始列為五鎮

唐書李吉甫列傳魏博田季安疾甚吉甫請任薛平為義成節度使以重兵控邢洺因圖上河北險要所在帝張於浴堂門壁每議河北事必指吉甫曰朕日按圖信如卿料矣

羊祜列傳祜以孟獻營武牢而鄭人懼晏弱城東陽而萊子服乃進據險要開建五城收膏腴之地奪吳人之資石城以西盡為晉有自是前後降者不絕

涇野呂氏曰鹽池之成以大河北自蒲州折而東向轉
曲之間漸積畜匯有此與衍今陝西花馬池鹽亦近黃
河折流之處理或然也故唐博士崔敖曰鹽池乃黃河
陰潛之功浸淫中條融為巨浸盖有所見矣

解州志曰解鹽池堯時洪水方殷池尚淤泥禹貢鹽絺
但見青州周官有鹽鹽謂不煉治而成盖解鹽也故圖
經引穆天子傳有安邑觀鹽池之語

宋白曰華陰分秦晉之境邊晉之西則曰陰晉邊秦之

東則曰寧秦

胡三省通鑑註曰平原本齊地高帝置郡禹疏九河皆在平原渤海郡界

又曰終南山橫亘關中南面西起秦隴東徹藍田凡雍岐鄠鄠長安萬年相去且八百里而連綿峙據其南者皆此一山也

唐書天文志宋元嘉中南征林邑五月立表望之日在表北交州影在表南三寸林邑九寸一分交州去洛水

陸路九千里蓋山川回折使之然以表考其弦當五千乎
書疏云衡即古橫字漳水橫流入河故曰橫漳鄭康成
亦云橫漳漳水橫流深州志黃河北流漳水東注之河
縱而漳橫故曰橫漳

歐陽修嘗謂開河如放火不開如失火與其勞人不如
勿開

任伯雨奏禹之治水不獨行所無事亦未嘗不因其變
以導之蓋河流混濁泥沙相半流行既久迤邐淤澱則

久而必決者勢也或北而東或東而北亦安可以人力制哉為今之策正宜因其所向寬立隄防約攔水勢使不至大段漫流而已

漳河源於西山由磁州洺川南入冀州新河鎮與胡盧

河

即大陸非也備錄胡盧河在寧晉縣東南二十里連大陸澤判然二處在新河縣又似一處云胡盧河大

陸澤之俗名

合流其後變徙入於大河神宗熙寧三年詔程

昉王廣廉相視四年開修

元豐元年二府奏事語及淤田之利帝曰大河源深流

長皆山川膏腴滲漉故灌溉民田可以變斥鹵而為肥
沃朕取淤土親嘗極為潤膩

熙寧九年劉瑾言楚州寶應縣泥港射馬港山陽縣渡
塘溝龍興浦淮陰縣青州澗等可興置欲令逐路轉運
司選官覆按

古北口外舊有小興州大興州宜興縣鳳州等處宋蘇
轍古北道中詩亂山環合疑無路小徑縈迴長傍溪彷彿
夢中尋蜀道興州東谷鳳州西明初隸版圖永樂中

棄大寧淪沙漠矣

元和志晉澤在晉陽縣西南六里隋開皇六年引晉水
溉稻田周迴四十一里

通典枯絳渠在經城縣界在絳水之東者古兗州域絳
水之西則古冀州域也經城縣在今順德府廣宗縣東
二十里

史記正義引括地志云沆東至溫縣西北為濟水又南
當鞏之北南入于河入河而南截度河南岸溢滎澤今

無水成平地

括地志滎陽城在今滎澤縣西南十七里殷之敖地也
亦曰敖在敖山之陽戰國時韓曰滎陽

滎澤在滎澤縣治南今縣本禹貢溢為滎之地

敖山在河陰縣西二十里皇甫謐曰仲丁自亳徙囂即
敖也

鞏城在今鞏縣西南三十里周鞏伯邑漢置縣隋大業
初方移治洛口今縣治也在河南府東一百三十里東

至鄭州汜水縣六十里北至懷慶府溫縣二十五里
故溫城在今溫縣西南三十里周畿內國漢置縣于此
唐方徙今治在懷慶府東南五十里又東南至鄭州汜
水縣二十五里

晉書地理志古者有分土而無分民若乃大者跨州連
郡小則十有餘城以戶口為差降畧封疆之遠近所謂
分民自漢始也

今水經曰黑龍江入松花江松花江入混同江混同江

入海此語不確再考

又曰大江過城陵磯下合洞庭諸水逕岳州府臨湘縣其流清者為洞庭濁者為大江

四鎮之增為五也自隋開皇間始

元和郡縣圖志寧州定平縣隋大業十年于此築城置棗社驛

故鉏城在滑州衛南縣東十五里左氏后羿自鉏遷于窮石是也

泗州宿遷縣淮水入縣境南與楚州山陽縣分中流為界

解縣與安邑縣鹽池總謂之兩池官置使以領之每歲收利納一百六十萬貫

郭林宗墳在汾州介休縣東三里周武帝時除天下碑惟林宗碑詔特留

古諺曰襄陽無西以其西逼萬山即無東以其東逼漢江界促近也

金史卷八十三
卷三
湯居亳與葛為鄰寰宇記曰相去八十里

中牟縣西北七里有圃田澤范守已據穆天子傳以為
自洧川之北直抵中牟之西東連尉氏西接新鄭周迴
三百餘里總謂之圃田穆天子傳天子次于軍邱以畋
于藪鄭詩叔在藪火烈具舉而左傳所云取人于荏苻
之澤是皆其地矣今中牟得其地什之四洧川尉氏各
什之三

大學衍義補曰周以前河之勢自西而東而北漢以後

河之勢自西而北而東宋以後迄于今則自西而東而
又之南矣

洪武十八年三十一年及永樂初年皆詔令河南山東
等處荒田許民儘力開墾永不起科

宋紹興二十一年知臨江軍王伯淮奏曰清江縣有稅
錢四十餘貫苗米四百餘石人煙田產並在高安經界
既定兩縣隨產認稅于是清江有稅無田高安有田無
稅清江不免以無田之稅增均於原額之田高安即以

無稅之田減均于原額之稅是高安得偏輕之利清江
得偏重之害矣

曲洧新聞曰雒陽西至新安道路平曠自新安西至潼關
殆四百里重岡疊阜連綿不絕終日走硤中亡方軌列
騎處其間硤石及靈寶閭鄉間尤為險要古之崤函在
此真所謂百二重關也周在東不能西禦秦唐在西不
能東禦祿山悲夫

懷慶府知府紀誠疏曰如西華縣志洪武二十四年在

冊地止一千九百九十四頃有奇嘉靖十一年新丈地
一萬九千七百七十頃有奇永城縣原地一千五百三
十頃有奇嘉靖十一年新丈出二萬六千六百一十九
頃有奇二縣如此他縣可知是土地實增倍于其舊則
糧宜增而不增而顧以其糧分灑之此輕者益見其輕
也至河內縣原編戶一百二十餘里今併為八十三里
修武縣原編戶六十里今併為二十九里他縣亦皆類
是人逃而地漸荒則土地已非其舊夫糧宜減而不減

而復以其糧包賠之此重者益重無怪乎懷慶之民日困征輸而卒無以自安也

渦河在淮之北商船自淮入渦至河南祥符縣銅瓦廂

在縣

西北二十五里

以達陽武陽武去衛河只六十里此元人陸運

之故道也倘漕河中梗河道未能遽復而又不經黃河之險此亦備急之一策也

玉堂嘉話王黃華論汴河前宋以洛河入汴為京西漕路其後黃河徙南洛水舊道斷絕今汴河名存其實止

是京索須三水自滎澤南入汴河故道行流

越王句踐世家越王曰夏路以左劉氏云楚適諸夏路出方城人向北行以西為左故云夏路以左

括地志故長城在鄧州內鄉縣東七十五里南入穰縣北連翼望山無土之處累石為固楚襄王控霸南土爭彊中國多築列城于北方以適華夏號為方城

程大昌禹貢論曰孔穎達謂江南人呼水無大小皆曰江此特後世語耳古何嘗有是歟經自岷江以外無得

名江者漢水之大幾與江埒其未入江也止得名漢不得名江安有潯陽間九小流者方趨江未至而肯以江命之乎不獨江也淮河濟三名者其正派得之外此無有混言者濟之于河猶不得附借其名而江漢分枝僅得目為沱潛其嚴于名稱大抵如此

又曰太湖一湖而得名五湖昭餘祁一澤而得名九澤鼂氏謂未易可以必其得數之因其說通也

括地志漢張良墓在徐州沛縣東六十五里與留城相

近也故城在徐州沛縣東南五十五里今城內有張良廟

志稱漢中入關之道有三而入蜀中之道有二所謂入關中之道三者一曰褒斜道二曰儻駱道三曰子午道也所謂入蜀中之道二者一曰金牛道二曰米倉關道也今由關中以趨漢中由漢中以趨蜀中者謂棧道其北道即古之褒斜南道即古之金牛而子午儻駱以及米倉之道用之者或鮮矣

隴山在隴州西北六十里即隴坂也又有小隴山在州

西八十里一名關山以近隴關

即大震

而名也山長八十

里路通臨鞏

太白山在乾州武功縣西南九十里亦謂之太一山五

經要義武功有太一山一名終南蓋終南南山之總名

也張衡西京賦云終南太一是則非一山矣山接郿縣

及盩厔縣界北去長安三百里故俗云武功太白去天

三百

案武功太白去天三百乃辛氏三秦記中語若據但稱俗云蓋偶未考謹附訂于此

六典關

內道名山曰太白柳宗元云其地寒冰雪積之未嘗已
又南十里為武功山杜彥達曰太白南連武功最為秀
傑冬夏積雪望之皓然故云太白也軍行山下不得鳴
鼓角鳴則風雨暴至又山半有橫雲如瀑布則澍雨諺
云南山瀑布非朝即暮是也

惇物山在武功縣東南二百里漢志注縣東有垂山古
文以為惇物孔氏曰敦物即太華山似誤

武關在商州東百八十里輿程記自武關西北行四百

十里至藍田縣皆行山中至藍田始出險就平云

岐陽廢縣在岐山縣東北五十里唐貞觀七年置周太王居岐之陽即此

岐山在岐山縣東北十里一名天柱山其峯高峻狀若柱然六典關內道名山曰岐山俗名鳳皇堆山之南周原在焉即太王所居詩周原膠膠是也志云原東西橫亘肥美寬平在今縣東北四十里

宋白曰自興元東北至長安取駱谷路不過六百五十

二里是往來之道莫便於駱谷也而五季以來駱谷漸成荒塞何歟

鄭曉解大野既豬曰由是上源之來是澤有以受之下流之去是澤有以泄之始得而豬矣

解揚州曰今按地勢山起于西北澤匯于東南東南地卑萬水所湊揚州是也彭蠡在揚州西南合江南江東江西諸水以為澤三江在揚州東南分東江松江婁江諸水以為名

解浮于江沱潛漢曰禹貢之記貢道者如記二水曰浮于淮泗非謂近泗之地必由淮入泗也此荊州近于漢者則徑浮于漢不必自江而入漢也近于潛者則徑浮于潛而入漢亦不必自江也沱自華容縣出于江入于沔沔即漢也由江入沱由沱入漢一路也潛自漢出至潛江縣入于江由江入潛由潛入漢一路也

又曰江至東陵而北合于漢漢至大別而南入于江孔安國曰禹治水之後舜分冀州為幽州并州分青州

為營州始置十二州馬融曰禹平水土置九州舜以冀
州之北廣大分置并州燕齊遼遠分燕置幽州分齊置營
州金履祥曰分冀州自衛水以北為并州晉無間之地
為幽州碣石以東接青州之北為營州是為十有二州
焉

河渠書禹功施於三代自是之後滎陽下引河東南為
鴻溝以通宋鄭陳蔡曹衛與濟汝淮泗會文穎曰即今
官渡水也蓋為二流一南經陽武為官渡水一東經大

梁城即河溝今之汴河是也

韓邦奇曰古時汴泗皆在河之東南故灘入泗今河徙而南灘在河西泗在河東灘為河截斷不復能入泗矣王氏炎曰王莽時河行漯川大河不行于大邳之北而遂行於相魏之南則山澤在河之瀕者支川與河之相貫者悉皆易位而與禹貢不合矣

肇域記滎陽縣北三十里有鴻溝應邵曰鴻溝在滎陽

故城在
滎澤 東南二十里

河渠書索隱引張華云大梁城在浚儀縣北縣西北渠水東經此城南又北屈分為二渠其一渠東南流是始皇所鑿引河水以灌大梁謂之鴻溝楚漢會此處也其一渠東經陽武縣南為官渡水

寶應縣志運河隄自黃浦至界首長八十里即唐李吉甫所築平津堰也

邵二泉禹貢岷山導江之簡曰江漢水漲彭蠡鬱不流逆為巨浸無仰其入而有賴其遏彼不遏則此不積所

謂匯也者如此故曰北會于匯匯言其外也蠡言其內也于匯不于彭蠡勢則然也蓋寶志也江水濬發最在上流其次則漢自北入其次則彭蠡自南入三水並持而東則江為中江漢為南江彭蠡所入為北江可知矣非判然異派之謂也且江漢之合茫然一水唯見其為江也不見其漢也故曰中江曰北江然其勢則相敵也故曰江漢朝宗凡集傳謂經誤者非是餘干張克修云寶亦云

王禕子充水經序曰經云江水東逕永安宮南則昭烈
託孤於武侯之地也又其言北縣名多曹氏時置南縣
名多孫氏時置是又若三國以後人所為也又曰意者
桑欽本成帝時人實為此書及郭鄠二氏為傳注咸附
益之而璞晉人道元後魏人也

王子充曰十二野所以分天之綱者也其要在明乎躔
度而已九州所以分地之紀者也其要在明乎疆界而
已

方輿勝覽禹貢梁州之山四岷嶓蔡蒙西山皆岷北山
皆嶓南山皆蒙也

析支在河州西南徼外禹貢雍州有崑崙析支應劭曰
析支在河關西南千餘里羌人所居謂之河曲羌後漢
西羌傳自河關之西濱于賜支至于河首綿地千里皆
羌地賜支即禹貢析支也水經注引司馬彪曰自賜支
以西濱于河首羌居其右河東流屈而東北經賜支之
地是為河曲

宋河渠志趙伯昌言唐黜陟使李承建捍海堰是承既建常豐堰于山陽又于鹽城海門建此堰亦奇矣哉但混為一者則非常豐在山陽東南

華陽國志元鼎六年分廣漢郡為武都郡屬縣九東接梓潼西接天水北接始平

鄭賈水利書曰臣嘗論天下之水以十分率之自淮而北五分由九河入海書所謂同為逆河入于海是也自淮而南五分三江入海書所謂三江既入震澤底定是

也

單鍔吳中水利書曰嘗觀考工記善溝者水漱之善防者水淫之蓋謂上水湍流峻急則自然下水泥沙漱去矣

錢有威曰昔周夏二公治水吳中民初不便詢諸父老父老對曰相公開河功多怨少千載之後功在怨磨二公斷而行之功施到今

屠隆曰昔人之推水學者曰邦亶曰單鍔邦亶詳于治

田單鐔詳於治水兼而用水政舉矣

歸子顧請治吳松江疏宋時江面原濶九里可敵千浦
故與錢塘揚子並稱三江

今四川廣安大竹渠縣鄰水巴州通江南江達州東鄉
太平凡十州縣皆漢宕渠縣地而故城則在渠縣至今
營山縣界有巖渠廢縣乃梁置非漢縣也

舊唐書地理志海州東海縣縣治鬱州四面環海

又曰自至德後中原多故襄鄧百姓兩京衣冠盡投江

金史卷八十三
卷三
湘故荆南并邑十倍其初乃置荆南節度使上元元年
九月置南都以荊州為江陵府

又曰荆南節度使劍南西川節度使淮南節度使皆使
親王領之

又曰東京在西京之東八百五十里

又曰武德三年置瓜州五年改為西沙州皆治於三
危山在縣東南二十里

又曰沙州壽昌縣漢龍勒縣地陽關在縣西六里玉門

關在縣西北一百一十八里

又曰武州將利縣

今階州

秦漢白馬氏之地漢置武都郡

并縣愚按元和志將利縣本漢羌道縣地非武都縣地

也後魏宣武帝於武都鎮城

仙陵山之東

復置武都郡廢帝

改曰武州唐因之

肅明曰景范云均州禹貢雍豫二州境最合為不知者將雍改作荆非也

肅明又細考均州為雍豫州境亦非蓋唐宋之均州自

為郡兼領鄆鄉即今鄆縣鄆西縣地也此二縣與商州

上津縣

此指唐

接界謂之雍豫二境則可今均州屬襄陽

府而明成化間別以鄆縣置鄆陽府則此州直為豫州之地不得言二州之境也鄆及鄆西亦當屬豫其漢南諸縣則荆也

三國志董昭傳太祖將征烏丸患軍糧難致鑿平虜泉州二渠入海通運昭所建也

陳湯每過城邑山川常登望鄧艾每見高山大澤輒規

度指畫軍營處所

元人進金史表曰勁卒擣居庸關北拊其背大軍出紫
荊口南搯其吭此古今都燕者防患之明驗也

又曰西北之山東起醫無閭西接太行其為要害之關
曰紫荊居庸倒馬居庸巖險易守倒馬去燕稍遠紫荊
則跨於居庸而近於倒馬金人知守居庸不知扼紫荊
非失計耶

楊守謙每閱紫荊輿圖見所謂五虎嶺者為元人敗金

卷三
之處則汗流浹背神不怡者累日嗚呼勞臣志士之心
事至今猶可以歎息也

紀陟有言疆界雖遠險要必爭之地不過數四猶人六尺
之軀要害亦數處耳大江之南上流之要害江陵武昌
襄陽九江是也江水源於岷山下夔峽而抵荆楚則江
陵為之都會岷冢導漾東流為漢漢沔之上則襄陽為
之都會諸葛亮謂荊州北據漢沔利盡南海東連吳會
西通巴蜀此用武之國也沅湘諸水合洞庭而輸之江

則武昌為之都會豫章西江與鄱陽之浸匯于湓口則
九江為之都會昔人言天下之勢秦蜀為首東南為尾
中原為脊周瑜語孫權曰據襄陽以威操北方可圖也
庾翼謂襄陽西接梁益與關隴咫尺北去河雒不盈千
里進可以掃蕩秦越退可以保據上流岳飛謂襄陽等
六郡為恢復中原基本此用荆襄以制中原之策也孫
氏奄有公安江陵都武昌鄂州江南已定遂定都建業
江左以來但有揚荆湘江梁益交廣荆揚二州為天下

根本陸抗有言無江陵是無荊州也無荊州是無吳也
江陵有急當傾國爭之是故江淮所恃以為藩籬者江
陵也江陵所恃以為唇齒者襄陽也此用荊襄以固東
南之策也

元有得宋奏議以獻者下諸將議郝經獻議曰彼之素
論謂有荆襄則可以保淮甸有淮甸則可以保江南先
是我有荆襄有淮甸上流皆自失之今當先荆後淮先
淮後江從彼所保以為吾所攻

王宗沐建議於萬厯曰唐都秦右據岷涼左通陝渭有險則天寶興元乘其便無水則會昌大中受其貧宋都梁背負大河面接淮泗有水則景德元祐享其全無險則宣和靖康受其病國家都燕北有居庸醫無閭以為城南有大海以為池天造地設山環水衛而自塞其利者何也都燕之受海猶憑左臂從腋下取物也置海漕而專力於河一夫大呼萬櫓皆停腰脊咽喉之譬先臣邱濬之諄復者不可不慮也



潛邱劄記卷三

欽定四庫全書

子部

潛邱劄記卷五

詳校官中書臣王鵬

員外郎臣牛稔文覆勘

總校官檢討臣何思鈞

校對官中書臣胡敏

謄錄監生臣謝振宇

欽定四庫全書

潛邱劄記卷四

山陽閻若璩撰

喪服翼註

愚向謂有當請於朝早加刊正無疑誤後人者莫過王
子有其母死者之註註引陳氏

者卿字壽老臨海人著孟子紀蒙

曰王

子所生之母死厭於嫡母而不敢終喪誤亦有自來趙
岐註孟子王之庶夫人死迫於嫡夫人不得行其喪親

之數當歧同時康成亦註孟子未知其解云何要喪服
記公子為其母練冠麻麻衣縗緣既葬除之康成註曰
諸侯之妾子厭于父為母不得伸權為制此服不奪其
恩也傳曰何以不在五服之中君之所不服子亦不敢
服也蓋諸侯尊絕旁期已下何有于妾公子被厭不敢
私服其母父卒猶有先君餘尊所厭亦不過服大功其
嚴如此晉胡澹所生母喪嫡母尚存疑不得三年以問
范宣宣答曰嫡母雖貴然厭降之制父所不及婦人無

專制之事豈得引父為比而屈降支子也說與鄭註合不知何緣孔穎達疏戴記多有厭于適母之說流傳至宋闌入集註朱子亦有取于此遂成不刊之典明初大明令載庶子為其所生母齊衰期注謂嫡母在室者後孝慈錄成益定制子為母雖父在庶子為其母雖母在皆斬衰三年於序文中特言之何其甚也夫母在為所生斬猶可言也父在為所生並同不可言也始焉非所厭而云厭猶知有母也既焉竟無復有所厭是不知有

父也冠履倒置至此極矣推其失集註實不能辭且公
子為其母練冠之下麻衣之上仍有一麻字蓋以麻為
經帶何竟遺去是不獨請早加刊正且加補正云爾余
既緣孟子而斷曰母不厭子因徧檢儀禮禮記註疏又
得五言曰祖不厭孫舅不厭婦姑不厭婦夫不厭妾女
君不厭妾若此者亦可作經讀

鄭康成言服之降有四君大夫以尊降公子大夫之子
以厭降公之昆弟以旁尊降為人後者女子子嫁者以

出降余謂仍有以餘尊降如父卒服未除而遭母喪仍服期公之庶昆弟為母妻昆弟止大功蓋一為父之餘尊所厭一為先君之餘尊耳又殤以年降是服之降有六也若此者亦可補入註疏

或問母不厭子姑不厭婦則吾既聞命矣乃若宗子母在為妻禫似仍有相厭之意特為宗子妻尊夫為妻伸禫耳余曰否此自為同宗男女宗子之母在則不為宗子之妻服補明一筆夫仍禫耳故朱子言喪服小記是

解喪服傳孔穎達疏嫌畏宗子尊厭其妻果爾當云雖
宗子為妻禫不得有母在字面陳澧集說然則非宗子
而母在者不禫矣說益非

期之喪有禫者二父在為母為妻是也三年之喪亦有
不禫者二臣為君三年而后葬者但有練祥而無禫是
也或曰臣為君僅二十五月輒除無復禫見通典鄭學
之徒所云渠何從而知之乎余曰以喪服小記列當禫
之喪有四曰為父為母為妻為長子孔疏復補出二禫

曰妻為夫為慈母不曰臣為君故知之

或又問父在為母期期之喪莫有重焉為妻服與此同
得毋甚與曰非甚也段成式酉陽雜俎解得致精一切
傳註未及曰今之士大夫喪妻往往杖者據禮彼以父
服我我以母服報之杖同削杖也使子夏復生聞之亦
應首肯且不特削杖一也拜用稽顙二也十一月而練
十三月而祥十五日而禫三也為母期雖除猶申心喪
三年為妻禫已過夫必三年然後娶以達子之志種種

皆同豈他旁親之期所敢並與

禮有六不厭而有二厭一曰君厭臣公卿大夫厭于天子諸侯降其衆臣布帶繩屨是一曰父厭子父在為母降至期父卒直伸三年之衰不伸斬是或問何不云夫厭妻余曰妻之言齊也體與夫敵不得厭之使無服或服為之降當又得一言曰夫不厭妻以補註疏然則妻之不厭也貴也妾之不厭也賤也貴貴賤賤門內之治定矣

女女子為曾祖父母祖父母是正尊雖出嫁亦不降為
世父母叔父母姑姊妹是旁親雖未嫁苟十五已後即
逆降父為嫡子三年斬縗而不去職者蓋崇禮殺情也
父在為母縗期却罷職居心喪三年則情伸而禮殺
范甯言子夏傳既云以支子繼大宗則義以暢矣不應
復云適子不得繼大宗此乃小宗不可絕之明文矣余
謂絕有二有天然而絕者有以後人而絕者苟天然而
絕在大宗則為之置後俾適適相承統領百世之族人

若小宗則聽之不必復取他支子以後之蓋彼不過五世則遷耳此大宗小宗之別也何休曰小宗無後當絕斯言得之賈公彥曰適子不得後人無後亦當有立後之義斯言失之

汪氏琬與予論禮服京師不合頗聞其盛氣既而歸近且合刊正續彙悉改而從我其中儀禮說二條有可喜者亟錄于此一日先王之制禮也在父黨則父子昆弟重而于父之姊妹恩殺矣故服諸父期服姑姊妹大功

在母黨則母之姊妹重而于母之昆弟恩殺矣故服從母小功服舅總先王所以嚴內外別男女而遠嫌疑者也唐太宗謂加舅服使與姨母同太宗知禮孰不知禮二曰凡父黨之尊者由父推之皆父之屬也世父叔父從祖祖父是也至父之姊妹則不可謂之父不可謂之父其可謂之母乎二者皆不可以名故聖人更名曰姑爾雅謂我姑者吾謂之姪蓋姑亦不敢以昆弟之子為子也凡母黨之尊者由母推之則皆母之屬也從母是

也至母之昆弟則不可謂之母不可謂之母其可謂之
父乎二者皆不可以名故聖人更名曰舅爾雅謂我舅
者吾謂之甥蓋舅亦不敢以姊妹之子為子也此先王
制名之微意也予謂爾雅僅有謂我舅者吾謂之甥一
語若二語並列即出子夏傳文汪氏小誤

章子留書曰母之兄弟曰舅父之姊妹曰姑舅母之次
也姑父之次也婦人謂夫之父曰舅母曰姑舅父之次
也姑母之次也白虎通亦云尊如父而非父者舅也親

如母而非母者姑也余亦曰男子謂妻之父曰外舅母
曰外姑蓋彼以我之父為舅我亦從而舅之懼其同於
母黨也故別曰外舅彼以我之母為姑我亦從而姑之
懼其同於父黨也故別曰外姑女子謂母之兄弟曰舅
謂夫之父亦曰舅謂父之姊妹曰姑謂夫之母亦曰姑
蓋女子居然以父母視其夫矣女子以父母視其夫可
以在室服父母之服服舅姑似猶不可

三年之喪又有無禫者二一心喪一追服三年者心喪

以二十五月為限見宋元嘉之制追服三年無禫見梁
天監二年何佟之議

古者男子有五斬女子止一斬在室為父出嫁為夫當
其為夫且降父之服而為期矣何有于舅失禮自唐貞
元中始也今也男子除父為長子之服臣為君之服斬
反有八蓋母加服斬自明孝慈錄始也母既然于是承
重之祖母所後之母皆然繼母慈母亦皆然合數之男
子有八斬女子服母繼母與父同是在室有三斬嫁服

舅姑并及承重之祖舅祖姑所後之舅姑繼姑慈姑亦
皆斬合數之女子有九斬焉何斬之多也蓋服制之變
于是為已極

汪氏琬臨歿刪其橐為堯峯文鈔戴晟西泠購以示我
讀之頗有幽冥之中負此良友之感蓋為余所駁正者
悉刊以從我有駁正而未及聞于彼者承謫仍故將來
恐疑誤後生不小一為喪服或問一條一為答或人論
祥禫第二書是也西泠請徵其說余曰同母異父兄弟

之服檀弓以為大功非同父異母者汪氏乃為之服曰
禮同父母之昆弟期同父異母之昆弟大功憶五十人
初授翰林官訖有問此中人物云何者余答以若吳任
臣之博覽徐嘉炎之彊記可稱二妙若李因篤之杜撰
故事汪琬之私造典禮恐亦未必有三焉一時流傳以
為口實私造典禮正坐此等耳答或人論祥禫第二書
曰昔漢儒有主二十七月者此據服問中月而禫之說
也魏儒有主二十五月者此據三年問二十五月而畢

檀弓祥而縞是月禫之說也唐儒又有主三十六月者此據喪服四制喪不過三年三年而祥之說也譌尤不可勝言三年之喪天經地義所在古今來凡數大折衷為鄭學之徒者一說王學之徒者一說杜君卿通典出復又一說直至宋英宗治平二年禮院奏曰謹按禮學王肅以二十五月為畢喪而鄭康成以二十七月通典用其說又加至二十七月終則是二十八月畢喪而二十九月初始吉蓋失之也祖宗朝據通典為正而未經講

求故天聖中更定五服年月勅斷以二十七月今士庶
所同望仍遵用大哉斯奏真所謂羣言淆亂折諸聖者
矣今漢儒主二十七月自指康成然服問無中月而禫
之文間傳有之當改作間傳唐儒主三十六月當改作
二十八月方合且所據乃間傳又期而大祥素縞麻衣
中月而禫禫而纖無所不佩之文並非喪服四制汪氏
云云唐無是人人無是說者也東海公聞而特過我曰
唐實有主三十六月者子知之乎余曰知之新唐書王

元感傳載元感初著論三年之喪以三十有六月鳳閣
舍人張柬之歷破其說曰云云當世謂柬之言不詭聖
人而元感論遂廢此最作史者妙處蓋世遠言湮邪說
易以誣民故不載元感原文者不足載也却載他人之
文於元感傳中以正元感也汪氏果指王元感乎則犬
之拾骨而已矣尚不至此大抵讀書不深又健忘耳東
海公曰善弟將轉告汪鈍翁已而不果余復有感宋英
宗治平二年乙巳至孝宗乾道五年己丑凡一百五年

朱文公居母祝令人憂輯家禮小祥用初忌大祥用第二忌日各短却一月與二十五月而畢相乖中月而禫乃中空一月今空至二月方成二十七月重服減之輕服增之進退兩無所據不知世儒何緣獨譏王肅杜預以短喪黜其從祀也書為一行童竊以逃文公既歿書始出不及刊修以為一定遂成萬世闕典豈不惜哉噫文公若此於汪氏乎何誅

或問律文夫凡承重妻並從夫服但爾時姑尚存自應

服其舅或姑斬妻從之是一時而有二斬矣抑不從耶
余曰禮有之有適子者無適孫則有適子婦者無適孫
婦可知也仍服大功或曰婦人既嫁從夫夫天也妻其
敢貳于天乎余曰夫服祖父母期妻則大功夫服本生
父母期妻亦大功不從夫而服者多矣奚有于是

或問祖卒孫既承重訖矣久之祖母卒孫又應承重但
祖母其所生者也承則無重之可言不承則己己名為
適孫將若何余曰喪服小記祖父卒而后為祖母後者

三年疏曰此一經論適孫也律文適孫祖在為祖母承重止齊衰杖期亦指適孫非庶孫也竊以庶孫可立而為適孫妾必不可以升為妻仍服期汪氏琬有妾宜無服一篇或難妾之子而既貴矣天子且許之貤封而家長獨不可援古而服總乎琬曰天子自貴其卿大夫之母家長自賤其妾律文之與勅也誥也是皆出於天子並行不悖者也或又難律文得毋有關與曰國家辨妻妾之分嚴適庶之閑其防微杜漸也可謂深切著明矣

而又何闕文之有

或問古者父妾不論有子無子皆得謂之母唐開元禮則云庶母父妾之有子者始為之總此子字男耶女耶余曰開元禮不可知若今律文與此同者則指男而非女矣何以驗之子即齊衰杖期條之適子衆子斬衰三年條之所生子之子也或曰安知其非女女無杖此有杖故知指男子也然則宜何稱律文父妾無子則不得以母稱今既已有女為吾之姊若妹也者吾亦從而母

之矣不可但不敢加服焉是于明太祖隆妾之後而少
寓殺抑之微意似為先王之所許者

里中劉氏之喪兄既不拜弟有以嫂可拜其叔為疑者
余曰鄭康成有言正言嫂叔尊嫂也若兄公於弟之妻
則不能也兄公今之大伯之稱大伯之尊於弟之妻猶
嫂之尊於夫之弟雖在流俗大伯猶于弟妻弗拜則嫂
不宜拜夫之弟何疑故曰夫妻牀合也又曰夫尊于朝
妻貴于室矣

或有庶母卒者其父既從律服齊衰杖期矣而子來問
已宜何服余曰無服蓋律所不載也或因問父既如是
其重服子獨不可準之而少降乎余曰此則以意自為
服也不可之甚者也蓋此服載明洪武七年孝慈錄原
明太祖溺情于孫貴妃之薨變禮于懿文太子及諸王
非其所生者一時制耳豈真謂有王者起視如金條玉
律莫可擬議也哉噫沿之而誤且三百三十有二年矣
自唐武后上元初表請升母服與父同然仍齊衰三年

耳非至如明孝慈錄之一無差等母同父斬率情變禮之甚者也遵行且三百年未見有人焉議請刊正者豈非一懾于明太祖之嚴威再便于己情之得伸而無所復屈也哉然周公以來制服有齊衰杖期齊衰不杖期齊衰三月與齊衰三年並列為四齊自是沒不復見矣傷哉余嘗反覆思維欲上留古制而下適乎時宜不得已如作春秋調人也者為之議曰父在母沒請為母服齊衰三年父沒然後服斬衰則厭降之義既行免懷之

恩亦報而人道不至流于野人者此為庶幾耳

喪服傳曰父在為母期屈也至尊在不敢伸其私尊也
又曰禽獸知母而不知父野人曰父母何筭焉都邑之
士則知尊禰矣喪服四制曰資于事父以事母而愛同
天無二日土無二王國無二君家無二尊以一治之也
故父在為母齊衰期者見無二尊也此三條者能日百
遍誦之則褚無量所歎俗情膚淺不知聖人之心者庶
其有悟乎

胡致堂真西山並以漢文短喪詔其大指蓋為吏民初未及於嗣君說非也漢文明詔天下吏民令到出臨三日皆釋服三日者吏民之服也殿中當臨者皆旦夕各十五舉音禮畢罷以下服大紅十五日小紅十四日纖七日釋服三十六日者殿中當臨者之服也殿中當臨非太子與百官而誰哉然文帝之意則詔天下以為已而服非詔天下以盡為其親而服是文帝固未嘗教天下以薄其親也然此詔以後天下不復有喪三年者

矣嗚呼豈非上有好者下必有甚焉者與又豈非下之人祇從其意而不從其令與終西漢世服父喪三年惟原涉母喪三年惟薛修河間惠王良後母喪三年惟公孫弘師喪三年惟侯芭外此則杳無聞詩曰庶見素衣兮我心傷悲兮聊與子同歸兮其殆五子之謂焉

杜元凱謂漢氏承秦率天下為天子終服三年是三年之喪在暴秦猶不廢也平帝崩王莽令吏六百石以上皆服喪三年是三年之喪在賊莽猶能復也由前言之

則漢文之罪大矣由後言之則晉武亦未盡善也

古者喪期無數孔穎達疏云哀除則止无日月限數也說頗非不若其疏三年問引此句云謂無葬練祥之數其喪父母之哀猶三年也故堯崩云如喪考妣三載則知堯以前已三年余謂豈惟堯以前蓋自有天地即有人類有人類即有恩愛而喪紀緣之而興善乎荀卿言三年之喪人道之至文者也是百王之所同古今之所一也未有知其所由來者也

此九字見前小戴綴於此小戴輯入經

又言殺人者死傷人者刑是百王之所同未有知其所由來者也班固採入史兩未有知其所由來者也語致精

百姓如喪考妣三載蔡傳云百姓圻內之民大非孔安國傳雖晚出然多本于王肅解百姓為百官蓋有爵土者為天子服斬衰三年禮也內如舜及四岳九官等外如十二牧及十二州之諸侯孟子所謂舜帥天下諸侯以為堯三年喪是蓋百姓二字孟子原知有舜在內方

作此辯證不然果圻內之民孟子生千載下何從而知舜同諸侯為堯持服也耶此即以經解經恐元陳樵先生不應獨美于前矣

後漢書李固傳昔堯殂之後舜仰慕三年坐則見堯于牆食則覩堯于羹此即舜居堯喪之實事註疏皆未之及

通典宋庾蔚之曰女子既出則無厭

馬融儀禮君母在則不敢不從服君母不在則不服註

曰從君母為親服也君母亡無所復厭則不為其親服也自得伸其外祖小功也

喪服小功章

馬融曰除嫡子一人其餘皆庶子也

開元禮曰出降者兩女各出不再降若兩男各為人後者亦如之

羅虞臣長子亦可為人後議孫遠死而無嗣其弟重以長子彬後之或曰重之命非也長子不得為後曰斯重宗之義也吾將以重為知禮矣昔子思兄死而使其子

白續伯父以主祖及曾祖之祭蓋遠嫌也以弟代兄是
謂奪宗以子繼伯父則有父命焉其孔氏之家之變禮
乎重之命惡得為非

潛邱劄記卷四

欽定四庫全書

潛邱劄記卷五

山陽閻若璩撰

補正日知錄

國語凡陳之道設右以為牝益左以為牡淮南子墜形訓邱陵為牡谿谷為牝又牝土之氣御于玄天又所謂地利者左牡而右牝

唐詩話韓翃久家居一日夜半客叩門急賀曰員外除

駕部郎中知制誥曰誤矣客曰郎報制誥闕人中書兩進名不從云云是郎報字亦見于此

單名以偏旁為排行如衛瓘衛玠之流按晉書玠乃瓘之孫非弟也

漢書言李固杜喬朋心合力致主文宣而孝桓即位之詔曰臧吏子孫不得察舉按桓即位于閏六月庚寅先三日丁亥李固策免杜喬為太尉在次年之六月詔乃即位後四十四日丙戌下於李杜皆不相涉

宣防既築導河北行復禹舊迹而梁楚之地復寧無水災自漢至唐河不為害幾及千年按此說大非復禹舊跡無水災此史記河渠書之文若溝洫志則續之曰自塞宣房後河復北決於館陶分為屯氏河地理志魏郡館陶縣下注云河水別出為屯氏河東北至章武入海是也雖不知的在何年要武帝元封二年壬申後宣帝地節元年壬子以前事余嘗謂禹之時河自碣石入海至周定王五年河徙從鄴縣東北入海此一變也漢

武元封後宣帝地節前河又從渤海郡章武縣入海此又一變也古今何等大事而亭林亦未考及耶

寧老云詩儀字凡十見皆音牛何反按相鼠詩儀與皮為叶東山詩儀與縞叶湛露詩儀與椅離叶斯干詩儀與議罹叶若讀為延知切似亦未為不可

堯舜禹皆名也古未有號故帝王皆以名紀臨文不諱按曲禮詩書不諱臨文不諱盧植註曰臨文謂禮文也禮執文行事故言文也鄭康成註曰謂其失事正也

陳澧註曰不因避諱而改行事之語蓋恐有誤於承用也從來解文字皆如此而從來引此句多誤豈寧老亦未之免邪要當用詩書不諱耳

武王伐紂第二則云武王克商不以其故都封周之臣而仍以封武庚及武庚既畔乃命微子啓代殷而必於宋焉蓋不以畔逆疑其子孫而明告萬世以取天下者無滅國之義也故宋公朝周則曰臣也周人待之則曰客也自天下言之則侯服于周也自其國人言之則以

商之臣事商之君無變于其初也平王以下去微子之

世遠矣而曰孝惠娶于商

左傳哀二十四年傳

曰天之棄商久矣

僖二十二年傳

曰利以伐姜不利于商

哀九年傳

吾是以知宋之得

為商也

按左傳哀二十四年孝惠娶于商此宗人釁

夏對魯哀公之言宋林氏註曰稱商不稱宋者避定公

諱也此解絕妙寧老獨未見耶僖二十二年楚人伐宋

以救鄭宋公將戰大司馬固諫曰天之棄商久矣君將興

之弗可赦也已不曰棄宋而曰棄商者此即下文寡人

雖亡國之餘之意亦即一姓不再興之說也今取以證
宋得為商竊恐寧老未識當時立言之意因思僖二十
一年宋人為鹿上之盟以求諸侯於楚公子目夷曰小
國爭盟禍也宋其亡乎此處斷宜稱宋則彼處稱商正
可意會哀九年晉趙鞅卜救鄭遇水適火史龜曰是謂
沈陽可以興兵利以伐姜不利于商不曰伐齊與宋而
變文言姜言商者取于上文陽兵協韻

毛詩古音考可
以興兵兵音邦

此固古人文字之常只觀下文伐齊則可敵宋不吉二

語不用韻協便直稱齊宋本號則可見矣

第三則遷頑民于洛邑 按寧老云頑民皆叛逆之徒也其與乎畔而遷者皆商世臣大族不與乎畔而留于殷者如祝鮀所謂分康叔以殷民七族是以陶氏施氏繁氏錡氏樊氏饑氏終葵氏為殷之庶民矣請問上文分魯公以殷民六族條氏徐氏蕭氏索氏長勺氏尾勺氏使帥其宗氏輯其分族將其醜類以法則周公用即命於周是使之職事於魯一則曰宗氏再則曰分族尚得

謂非商之世臣大族乎豈同一氏族而分於康叔者獨為民乎此不可解

豐熙偽尚書云其曰附後洪範一篇則所云惟十有三祀王訪于箕子者必冠之以周書文義乃通 按左傳屢引洪範皆目為商書不曰周書說者謂為此夫子未刪前之書名也今云必冠之以周書文義乃通亦不必然

寧人謂春秋蓋必起自伯禽之封以洎于中世當周之

盛朝觀會同征伐之事皆在焉故曰周禮而成之者古之良史也 按杜元凱春秋經傳集解序便知春秋一書其發凡以言例皆周公之垂法仲尼從而修之何必言起自伯禽與成之古良史哉又左傳隱七年謂之禮經杜註曰此言凡例乃周公所制禮經也

寧老謂桓十七年五月無夏 按桓十七年五月有夏春秋自僖公以前大夫並以長幼之字為稱 按春秋自莊十二年衛大夫已稱子石祁子是也大夫稱子莫

先于此或曰何以見祁為謚案鄧祁侯杜註祁謚也是也次則甯莊子見閔二年論語有卞莊子為魯卞邑大夫

又云孟孫氏之稱子也自蔑也

文十五年

按國語有孟文

子即左傳文伯也又先蔑之稱子亦當附見

又云叔孫氏之稱子也自豹也

襄七年

按國語定王八

年有叔孫宣子即左傳叔孫宣伯也又先於豹稱子亦當附及又按叔孫豹於襄二年稱穆叔於襄七年稱穆

子亦稱穆叔至此後則或稱穆叔或稱穆子不一又於襄七年稱昭伯於昭四年稱昭子一人之身倏字而倏子豈一人之身倏貴而倏賤乎竊以為通稱

又云季孫氏之稱子也自行父也

文十三年閏元年書季子二年書高子

皆春秋之特筆

按季孫氏之稱子也自行父也見文六年不

待十三年

又云欒氏之稱子也自枝也

僖二十八年

按左傳桓三年

有欒共叔然國語稱為欒共子又先於欒氏之有貞子

亦當附見

又云范氏之稱子也自會也

宣十二年

按范氏之稱子也

亦自渥濁也並見十二年

又云魯之三家稱子他如臧氏子服氏叔仲氏皆以伯叔字焉不敢與三家並也按子叔氏有齊子即叔老有敬子即叔弓一見襄十四年一見昭三年誰謂不敢與三家並乎又昭四年豎牛賂叔仲昭子與南遺杜註昭子叔仲帶也昭十二年南蒯語叔仲穆子且告之故

杜註穆子叔仲帶之子叔仲小也

第二則又云君前不敢子也 按文六年亦稱趙衰為

成季非對君言也何解

陽子成季之屬也故黨于趙氏

君前臣名禮也

孟子稱莊暴於齊宣王前曰莊子誠所未解

又云論語之稱子者皆弟子之於師

如云非不說子之道衛君待子而為

政之

按陳子禽謂子貢曰凡兩稱子猶曰亢子貢弟

子也若夫子之於季子然一稱子於季康子四稱子陳

亢問於伯魚亦稱子桀溺問於子路亦稱子子路問於

丈人亦稱子豈皆弟子之於師乎其說不可通矣或曰然則若何愚曰改皆字為多字庶乎其尚可耳

又云孟子之稱子者皆師之於弟子按孟子於平陸大夫蚺鼃沈同留行之容畢戰陳相景春戴不勝淳于髡告子慎子白圭宋句踐滕之或人俱稱之為子豈皆弟子乎至曹交者集註明謂不容其受業亦稱之為子其說尤不可得而通矣

寧老云外大夫若宋若鄭若陳若蔡若楚若秦無謚也

而後字之 按外大夫無謚者而後書字請問齊隰朋

謚成子見國語註是隰朋固有謚矣何左傳止稱為隰

朋猶可解曰注也

注本世本

再請問鄭子產謚成子見國語

是子產亦有謚矣何左傳止稱為子產公孫僑與子美

猶可解曰此外傳也再請問鄭子產之子參字子思謚

桓子是亦有謚矣何左傳不稱為國桓子而必連其字

曰桓子思問至此當無辭矣

寧老謂古人琴瑟之用皆與歌並奏故有一人歌一人

鼓瑟若漢文帝使慎夫人鼓瑟上自倚瑟而歌是也亦有自鼓而自歌孔子之取瑟而歌是也按史記趙世家武靈王夢見處女鼓瑟而歌詩亦自鼓自歌者

又云衛靈公聽新聲於濮水之上而使師延寫之則但有曲而無歌按國語晉平公說新聲註曰新聲者衛靈公將如晉舍於濮水之上聞琴聲焉甚哀使師涓以琴寫之至晉為平公鼓之師曠撫其手而止之曰此亡國之音也師延為紂作靡靡之樂後乃自沉於濮水之

中聞此聲者必於濮水之上乎當作師涓不當作師延
何不用論語鼓瑟希鏗爾舍瑟而作邢疏曰鏗投瑟聲
也此即有曲而無歌

三年之喪云今從鄭氏之說三年之喪必二十七月其
過於古人一也 按從鄭氏說者正合於古人王肅乃
故與鄭反朱子所謂王肅議禮必反鄭元是也王肅且
以此獲短喪之譏寧老豈未之聞耶

又云今婦為舅姑亦服三年其過於古人三也 按婦

為舅姑三年吳幼清亦嘗辯之見服制考詳序甚佳

第二則云今人以初喪四十九日居於柩側謂之七七

唐李翱集中有楊塋撰喪儀其一篇云七七齋

按魏書胡國珍傳詔自始薨

至七七皆為設千僧齋令七人出家

孟子外篇云周禮大行人註引孟子曰諸侯有王顏氏家訓引孟子曰圖影失形廣韻圭字下註曰孟子六十四黍為一圭十圭為一合今孟子書皆無其文豈所謂外篇者耶按王應麟孟子考異焦弱侯焦氏筆乘所

載古人引孟子外篇者其語甚衆何僅寥寥引此近尤
詳繹史

兩漢風俗云云 按晉世祖泰始元年乙酉以傅元為
諫官元上疏曰近者魏武好法術而天下貴刑名魏文
慕通達而天下賤守節其後綱維不攝放誕盈朝遂使
天下無復清議云云是致毀方敗常之俗魏文非魏武
也愚嘗為之說曰清談之風一盛於王何再盛於嵇阮
三盛於王樂而晉亡矣然其端則自文帝始此亦論世

者之不可不考也

唐宋以前上下通行之貨一皆以錢而已未嘗用銀

按東阿子文定公筆塵所載古今用銀事尤詳

又云漢書食貨志言秦并天下幣為二等而珠玉龜貝

銀錫之屬為器飾寶藏不為幣漢武始造白金三品尋

廢不行按孝武始造白金三品乃雜鑄銀錫為之此

即漢書安息國以銀為錢之制竟認作銀非其文有龍

有馬有龜觀錢譜可知所直各不同王莽即真始直用

銀朱提銀重八兩為一流直一千五百八十它銀一流直千是為銀貨二品是也

又云唐韓愈奏狀亦言五嶺買賣一以銀按張籍送南遷客詩海國戰騎象蠻州市用銀

又云金至元光二年寶泉幾於不用哀宗正大間民間但以銀市易此今日上下用銀之始按紹興歲幣銀二十萬兩絹二十萬疋又糜費銀一千三百餘兩非上下用銀之事乎何必金大抵見北宋所著書上下用銀

已不計其數矣

寧老云今人但以貢生為明經非也唐制有六科一曰秀才二曰明經三曰進士四曰明法五曰書六曰算當時以詩賦取者謂之進士以經義取者謂之明經今罷詩賦而用經義則今之進士乃唐之明經也 愚嘗見

茅鹿門評韓昌黎贈張童子序曰張本與昌黎同舉進士不覺失笑童子自是明經昌黎方是進士兩人出身各不同今昌黎榜進士凡三十餘人姓名具在無所為

童子也鹿門其亦未識古今貢舉之制乎今見寧老此論實獲我心又按金有經義進士詞賦進士進士中兼二種亦不可不知

進士有甲乙二科按唐書諸進士試時務策五條帖所讀一大經經策全得為甲第策得四帖過四以上為乙第

第二則云甲乙丙科始見漢書儒林傳平帝時歲課博士弟子甲科四十人為郎中乙科二十人為太子舍人

丙科四十人補文學掌故匡衡傳數射策不中至九乃
中丙科 按漢書蕭望之傳以射策甲科為郎儒林傳
房鳳以射策乙科為太史掌故太常如此則三科故事
俱全

元祐八年三月庚子中書省言進士御試答策多係在
外準備之文云云又云是當時即以經義為在外準備
之文矣 按前云進士御試答策多係在外準備之文
此自指策而言與經義無干今寧老云是當時即以經

義為在外準備之文當時何曾

第二則言楊文貞言洪武四年十七年開科及十八年會試猶循元制作經疑至二十一年始定今三場之制今之經義又不如經疑多矣按元試士用經疑亦用經義此則專用經疑不用經義矣大非

六國獨燕無後云七國之時人主多任其貴戚云云至秦則不用矣按樗里疾秦惠王異母弟亦嘗相武王以縣統鄉以鄉統里備書之者史記老子楚苦縣厲鄉

曲仁里人 按楚非國乎當增一句曰以國統縣又按孔子生魯昌平鄉陬邑是又以國統鄉以鄉統邑

又云書邑里而不言鄉史記聶政軹深井里漢高祖沛豐邑中陽里人衛太子亡至湖泉鳩里 按陳丞相平者陽武戶牖鄉人也是又書邑鄉而不言里

其都亭則如今之關廂 按漢書循吏傳召信臣出入阡陌止舍離鄉亭是又有鄉亭又必有牢獄詩小雅宜岸宜獄陸云鄉亭之繫曰岸官府曰獄是也

又云司馬相如往臨邛舍都亭云云 按漢書翟方進傳北地浩商為義渠長所捕亡長取其母與緞緒連繫都亭下亦宜考及

劉衡碑云為勃海王郎中令以兄琅琊相憂即日輕舉按趙相劉衡碑以兄琅琊相亡即日輕舉非憂字也

從金石錄

又云楊著碑云遷高陽令遭從兄沛相憂篤義忘寵飄然輕舉 按高陽令楊著碑拜思善侯相遭從兄沛相

憂篤義忘寵飄然輕舉此作遷高陽令誤

東向坐第一則云古人之坐東向為尊歷引史云云以
今之南面為尊非是第二則云舊唐書盧簡求子汝弼
為河東節度副使府有龍泉亭簡求節制時手書詩一
章在亭之西壁汝弼復為亞帥每亭中譙未嘗居賓位
西向俛首而已是唐人亦以東向為賓位也 按韓昌
黎送幽州李端公序曰上堂即客階坐必東向亦可證
唐人以東向為尊又按南唐書伍喬赴試金陵故事中

選者主司必延之陞堂置酒時有宋貞觀者首就坐張洎續至主司覽其文揖貞觀南坐引洎坐於西酒至數行喬始上卷主司歎其傑作乃徙貞觀處席北洎處席南以喬居賓席及覆考榜出喬果為首洎貞觀次之時稱主司精於衡鑒賓席者東向者坐也是五代時亦然又按宋理宗齋居夜夢一真人戴冠佩玉延帝殿上即東席西向坐以賓禮揖上東向面命洋洋俄而夢覺

宋見

史

寺証云後漢書張湛告歸平陵望寺門而步註寺門即平陵縣門也 按馬援傳曉狄道長歸守寺舍註寺舍官舍也先於張湛傳又高陽令楊著碑聞母氏疾病醪榮投穀步出城寺

正五九月云唐朝新格以正五九月為忌月今人相沿以為不宜上任考唐書云云 按宋王勉夫野客叢書載正五九月為忌月其說尤詳當參閱

二名不偏諱云杜氏通典大唐武德九年六月太宗居

春宮總萬機下令曰依禮二名不偏諱今其官號人名及公私文籍有世及民兩字不連讀者並不須避諱按通典載高宗亦有詔不諱其名治亦當引及又註云通典又言太宗時二名不相連者並不諱至玄宗始諱之然永徽初已改民部為戶部而李世勣已去世字單稱勣矣按吾邑晉祠有唐太初貞觀二十年御製碑碑陰載當日從行諸臣姓名內有李勣已去却世字單稱勣是唐太宗在日已如此不待永徽初也愚嘗謂此段

可補史傳之闕寧老素留心金石文字豈未暇考及此耶

祖稱曾祖之父為高祖然自是以上亦通謂之高祖左傳昭公十七年郯子來朝曰我高祖少皞摯之立也則以始祖為高祖昭公十五年王謂籍談曰昔而高祖孫伯鯨司晉之典籍則謂其九世祖為高祖按周書康王之誥無壞我高祖寡命高祖文武也在康王之世稱文武為高祖是又以曾祖父祖父為高祖矣

藝祖第二則云宋王旦封祀壇序烈祖造新邦臻大定
經制而未遑神宗求治理致升平業成而中罷是以宋
太祖為烈祖太宗為神宗亦古人之通稱也 按吾太
原縣志載元豐八年韓絳崇聖寺碑銘序亦屢稱藝祖
神宗神宗即太宗

古時有人臣而隆其稱曰君者君奭君陳君牙皆此例
也猶漢時人主稱丞相為君侯也

漢書兒寬為御史大夫奉觴上壽制曰敬

舉君之觴

按丞相御史大夫官猶尊若嚴助為會稽太守

武帝賜書曰君厭承明之廬亦稱君

第二則云人臣稱君自三代以前有之孟子象曰謨盖都君按史記舜本紀一年而所居成聚二年成邑三年成都堯乃賜舜絺衣與琴為築倉廩予牛羊是時舜已為諸侯故曰都君非人臣也大抵上古時有德者民便往歸之奉而為君以主一國觀泰伯之在荊蠻可見春秋時稱卿大夫曰主按國語優施謂里克妻曰主孟昭我須知卿大夫之妻亦稱主也須知戰國策又以

主君稱諸侯秦策甘茂引樂羊曰主君之力魏策魯君

擇言稱主君之尊云云蓋一指魏文侯一指魏惠王也

幽并營三州在禹貢九州之外先儒謂以冀州地廣而

分之殆非也

孔安國馬融並云

按幽并營三州自九州分出

從來說家皆如此而寧老斷然謂在禹貢山川之外謂

幽在今桑乾河以北至山後諸州并在今石嶺關以北

至豐勝二州營在今遼東大寧並有塞外之地其山川

皆不載之禹貢故靡得而詳禹畫九州在前舜肇十二

州在後者似是臆說不過從肇十有二州肇者始也著想耳并在石嶺關以北請問周禮并州數曰昭餘祁昭餘祁實在太原府祁縣非石嶺關以南乎

班固漢書叙傳三代損益降及秦漢革剗五等立郡縣崔瑗郡太守箴有羸驅除焚典紀舊蕩滅蕃畿罷侯置守蓋自漢以下文人之論皆謂秦始皇廢封建立郡縣以余觀之殆不然云云按戰國策張儀為秦連衡說韓王韓王曰客幸而教之請比郡縣又張儀為秦破從

連橫謂燕王曰且今時趙之於秦猶郡縣也又昌國君樂毅為燕昭王合五國之兵而攻齊下七十餘城盡郡縣之以屬燕又蒙嘉為先言於秦王曰燕王願舉國為內臣比諸侯之列給貢職如郡縣又按國語晉公子夷吾私於公子絳曰君實有郡縣君謂秦君言秦亦自有郡縣則當秦穆公之世而固已有郡有縣矣此證尤妙真可謂一言破的何必紛紛又史記秦本紀武公十年伐邽冀戎初縣之十一年初縣杜鄭是又先於秦穆公

世有縣

又云左傳宣十二年鄭伯逆楚子之辭曰使改事君夷
于九縣註楚滅諸小國為九縣 按左傳宣十一年楚
子殺夏徵舒轅諸栗門因縣陳又王使讓之曰諸侯縣
公皆慶寡人獨此條面告寧老以為然又按哀十七年
彭仲爽申俘也文王以為令尹寔縣申息楚滅息見莊
十四年是莊十四年已有縣

又云昭五年遂啓疆曰晉十家九縣其餘四十縣 按

左傳昭三年初州縣欒豹之邑也又文子曰溫吾縣也
又晉之別縣不唯州又余不能治余縣凡四縣字先於
遂啓疆語二年

又註云周禮小司徒四甸為縣 按周書作雒篇千里
百縣縣有四郡宜補於四甸為縣之下

又云戰國策甘茂曰宜陽大縣名曰縣其實郡也則當
七國之世而固已有郡矣 按史記秦本紀惠文君十
年魏納上郡十五縣又後十三年置漢中郡

又云西門豹為鄴令云云 按史記秦本紀孝公十二年并諸小鄉聚集為大縣縣一令

又云蘇代曰請以三萬戶之都封太守千戶封縣令

按國策此二語乃趙勝為馮亭非蘇代也又按戰國策馬服君曰燕嘗以奢為上谷守又秦令韓陽告上黨守靳黈曰又齊人李伯見孝成王以為代郡守古郡守止稱守無太字至漢景帝中二年七月更郡守為太守始為太守史記於景帝以前事嘗叙太守者此自以後

代制度叙前人事迹其誤甚明索隱所謂太者衍字是也然戰國策叙馮亭上黨事凡五稱太守愚竊謂此後人傳寫者增加非當時實錄者古書如此類最多要當識者意會之

衛世家言二世元年廢衛君角為庶人是始皇時衛未嘗亡也按漢書地理志始皇既并天下猶獨置衛君二世時乃廢為庶人凡四十世九百年最後絕此證尤好

又云越世家言越以此散諸族子爭立或為王或為君
濱于江南海上服朝于楚秦始皇本紀二十五年王翦
遂定荆江南地降越君漢興有東海王搖閩越王無諸
之屬如今世之土司是越未嘗亡也 按越世家後七世至閩
君搖佐諸侯平秦漢高帝復以搖為越王以奉越後是
不特未亡於秦且從而亡秦矣

古所謂山東者華山以東管子言楚者山東之彊國也
史記引賈生言秦并兼諸侯山東三十餘郡後漢陳元

傳言陛下不當都山東

謂光武都雒陽

蓋自函谷關以東總謂

之山東

唐人則以太行山之東為山東杜牧謂山東之地禹畫九土曰冀州是也

而非若今

之但以齊魯為山東也

按戰國策蘇秦始將連橫說

秦惠王當秦之隆山東之國從風而服使趙大重又秦

惠王謂寒泉子曰蘇秦欺寡人欲以一人之智反覆山

東之君從以欺秦如此之稱山東不啻數百見何不一

引證又按漢書趙充國辛慶忌傳贊曰秦漢以來山東

出相山西出將贊所謂山西者明云天水隴西安定北

地諸處正在華山以西亦一妙證又按太史公自序蕭
何鎮撫山西正義曰謂華山之西也又按漢書地理志
秦地其界自弘農故關以西以之謂秦地則可謂山西
則不可又按史記留侯世家劉敬說高帝都關中左右大
臣皆山東人多勸上都雒陽此事又先於陳元又按寧
老云自函谷之東總謂山東只當言華山以東不必及
函谷關蓋函谷距華尚遠也華原屬晉地又按老杜送
舍弟穎赴齊州詩諸姑今海畔兩弟亦山東去傍干戈

覓來看道路通又有昔我遊山東憶戲東嶽陽是唐人
未嘗不專以齊魯為山東也

又云古所謂河內者在冀州三面距河之內史記正義
曰古帝王之都多在河東河北故呼河北為河內河南
為河外又云河從龍門南至華陰東至衛州東北入海
曲繞冀州故言河內蓋自大河以北總謂之河內而非
若今之但以懷州為河內也按左傳僖十五年賂秦
伯以河外列城五杜註曰河外河南也亦一證也戰國

策蘇子為趙合從說魏王曰大王之地北有河外註曰
河外即河南地不又一證耶史記廉頗藺相如傳秦王
欲與趙王會于西河外澠池註曰在西河之南故云外
則又一證矣又按戰國策黃歇說秦昭王曰王又舉甲
兵而攻魏杜大梁之門舉河內註曰屬司隸正義云即
懷州也在河南之北西河之東東河之西是古未嘗不
專以懷州為河內也漢書地理志河內郡有懷縣下註
曰莽曰河內是莽已以懷為河內不止今

水經註大梁靈邱之誤左傳桓九年云云 按戰國策
須賈為魏謂穰侯曰初時惠王伐趙戰乎三梁註曰春
秋秦取梁漢夏陽也河內有梁小邑也陳留浚儀大梁
為三皆魏地

太原第二則云舊唐書崔神慶傳曰則天時擢拜并州
長史先是并州有東西二城隔汾水神慶始築城相接
每歲省防禦兵數千人邊州甚以為便此即志所云兩
城之間有中城者也汾水湍悍古人何以架橋立城如此

之易 按水經注汾水云水上舊有梁青荇殞於梁下
豫讓死於津側亦襄子解衣之所在也此即指晉陽又
按唐李勣馬燧俱引晉水架汾河而東去故汾河東有
晉祠水利若以語寧老亦必不信又按萬厯間有僧妙
峯者立願於汾水上建橋鑿石於西山石條幾與山齊
惜此僧不久即逝後取以包太原縣城者即此石也未
用其百之一使此僧尚存橋必有成夫以一僧力尚如
此况崔神慶以朝廷之力乎所為跨水聯堞合而一之

如傳志所云者正不必為奇

泰山立石云嶽頂無字碑世傳為秦始皇所立云云又云後漢書祭祀志亦云上東上泰山乃上石立之泰山巔然則此無字碑明為漢武帝所立而後之不讀史者誤以為秦耳按後漢祭祀志乃上石立之泰山巔注引風俗通曰石高二丈一尺刻文曰事天以禮立身以義云云又張純傳上元封舊儀及刻石文刻石文即事天以禮等語也

跋素問

元人葛恒齋即可久諸父行也嘗立說以為醫當視時之盛衰為益損劉守真張子和輩值金人強盛民悍氣剛故多用宣洩之法及其衰也兵革之餘饑饉相仍民勞志困故張潔古李明之輩多加補益至宋之季年醫者大抵務守護元氣而已此說實發內經所未備

跋家禮

按年譜乾道五年文公年四十丁母祝孺人憂始輯家

禮其明年書成門人黃勉齋作行狀謂其後多損益未暇更定楊信齋亦謂家禮乃初年本也今姑即喪制考之其與經傳異者五齊衰悉有衰負版辟領一也婦人不衰二也既葬無受衰三也大祥用忌日則僅得二十四月又一日似乖二十五月而畢之義四也

若大祥僅二十四月

一日假使禫祭得卜在二十七月後一旬則是間二月而禫非間月矣

卜祭先上旬次中

旬與禮喪事先遠日相反五也自明孝慈錄集禮會典俱遵用此書以故沿襲至今殆非文公本意若萬厯中

坊本間有增損則益失其舊矣唯此為正德以前所刻
附以楊氏注劉氏增注補注雖有關謬差可喜也

跋火經

余家藏是書不記自何年實方伯公與羣芳譜手授先
祖者後羣芳譜不知何往而此書展轉流傳獨插敝架
上似冥冥中有相之者今年入長安司寇公聞之欣然
請觀遂以歸池北書庫幸題數語以見寒舍雖衰猶曾
與高門有孔李之舊云聞書庫饒異本只將宋王伯厚

鈔本集及其門人袁清容居士集假閱可以計日奉還
長安酒貴或不須我一瓶乎預白

跋金石要例

徐巨源曰古人合葬題不書婦今日暨配某者空同以
後不典之辭也余徵之空同文集凡八篇題有合葬字
無暨配字故曰以後其即指王道思輩哉頗不誤汪茗
文與人書刻石時篆蓋及誌文首行宜但云某銜某府君
幸勿加暨配字面有碑刻文集可考古人非畧之也於此

固有深義蓋女子從夫故祭曰祔食葬曰祔葬凡祔食者
惟立男尸而無女尸故曰同几則一尸亦此義旨哉言也
余戊午己未間在京師見汪荅文繆封公墓誌載及高
祖謂之曰古人叙人家世皆自曾祖以下無及高祖者
間及高祖亦必以其人其事足書非空空僅及其名諱
而已歷覽韓歐王荊公以及明初宋潛溪皆然此唐宋
以來高曾之規矩也但古人文多口訣未嘗筆諸書故
難卒曉要在讀者善體會雖以君所痛詆之前輩猶不失

此規矩其遺集可按也時哲文怒甚有代之答者曰家先生本元人余曰近得柳文肅集於廟市亦是曾祖叙起渠非元人耶後見三刻堯峯文抄此篇削去高祖諱某某五字此又當為書祖文廣一例耳惜道遠不及質黃太冲

黃太冲神道解有二余按後漢書中山簡王傳修冢塋開神道註曰墓前開道建石柱以為標謂之神道是又一神道解引孫何碑解不當遺文賦碑披文以相質以為始李翱又文心雕龍亦單名曰碑高祖上一世則稱五代祖最

確以此例之玄孫下一世則稱五代孫故漢書孔光傳
光孔子之十四世孫是司馬光以孔順為孔子六世孫
蓋自孫數起與古不合矣權文公為王端碑書孫以其
葬王父白文公碑崔孚書孫以其求文余按元微之誌
杜甫書孫以其葬王父兼求文云至韓昌黎長女改適
樊宗懿而李漢猶自居於子壻其故俟他日詳言之

跋邵文莊簡端錄

余年二十五歲始從同里吳太易先生學見先生手不

覽捨此書間請而觀焉復於先生曰未見甚佳處先生
微笑蓋先生病耳聾以為此自其恒狀越後二載取而
復讀徹首徹尾不覺沉酣尋味者彌旬以復先生先生
喜曰吾當日若嗤子子未必服固知吾子必有今日解
悟在其善開發人如此

跋春秋左傳屬事

余年二十前從同里靳茶坡先生學此書蓋得於其家
世頗希有紙亦糜爛不可久今冬豐暇日以錢百文付

匠裝裱遂新若手未觸顏介有言借人典籍者闕壞就為補治此亦士大夫百行之一也況已物乎吾子孫其謹識之

顧寧人左傳杜解補正止引邵二泉左鵬陸貞山左傳附註及此書辨悞而作未引趙子常補註縱間及其語似實未見全書近方一刻於崑山再刻於江都真元人所謂自科舉之學廢而古書稍出者也或難余今科舉未曾廢余答今科舉文字無復一毫體要倖中者至為

人夢想所不及雖不廢猶廢矣噫首有太倉二王公序
元美似一活套子隨題填寫元馭則道着肯綮或曰元
馭以春秋舉南宮第一人號名家宜乎其言之津津有
味余曰元美習周易何嘗不錯引為陳晦伯所駁正耶
不覺一笑

跋老蘇集

楊用九自吳門歸以余好收書於時下刊本尤易致也
購以餽余其籤題不曰老蘇全集而曰蘇老泉先生是

父冒子號矣蓋蘇氏先塋有老人泉子瞻取以自號不知何年謔以稱老泉一辨於葉石林再辨於焦弱侯以家藏子瞻墨蹟有東坡居士老泉山人圖書證尤妙此尚不曉何以刊為楊君謙見吳原博送新修姑蘇志正盥面瞥其籤題輒以水洒其使者不開卷擲而還之殆亦未為過矣

越明年庚辰首春戴唐器書來憶東坡得鍾山泉公書寄詩為謝云寶公骨冷喚不聞却有老泉來喚人果老

蘇號老泉坡敢於僧泉公者稱曰老泉乎真解頤新語
惜不令焦文端聞之也

古文尚書冤詞

孔穿曰謂臧三耳甚難而實非謂兩耳甚易而實是人
將從難而非者乎抑將從易而是者乎余則反其辭曰
偽古文尚書甚難而實是不偽古文尚書甚易而實非
人將從易而非者乎抑將從難而是者乎此余所以不
復與毛氏辨而但付之閤默爾

何休好公羊學著公羊墨守左氏膏肓穀梁廢疾康成
迺發墨守鍼膏肓起廢疾休見而歎曰康成入吾室操
吾矛以伐我乎余謂此自是學海遠遜經神故云爾若
在今日豈其然

跋僧某書千字文

千字文本有二篇一周興嗣一蕭子範子範製久失傳
而所次韻之書梁書以為羲之宋史以為鍾繇要梁書
近而得其真或曰興嗣當梁武帝朝被勅撰文能不染

佛氏一語信有勁骨者余謂四大字有二一出老子一出圓覺經詳篇中四大字非指地水火風乎然則時風衆勢所趨真能不染其片語隻字者不綦戛戛乎難哉僧家故習懷素書此獨宗晉人秀潤一洗惡習或疑轉捩太方是不知惟宋榻本乃見鋒稜耳

題劉隨州詩集

劉長卿之為盛唐也無可疑而分劉為中嘗推其故蓋高棟誤讀中興間氣集以中興為中唐于是所遷錢起

劉長卿等二十六人除孟雲卿外盡從而中之此致誤之由水心猶未核及至謂安祿山天寶三載為范陽節度使六載進御史大夫劉有落第送楊侍御赴范陽充安大夫判官詩詩云泣憐三獻玉此豈開元二十一年進士如極玄集所云者哉亦具眼人也

刊正楊升菴石經考

漢靈帝熹平四年蔡邕書六經於碑使工鐫刻立於太學門外此所謂一字石經也魏邵陵厲公正始中邯鄲

淳書石經亦立于太學此所謂三字石經也晉裴顧為祭酒奏修國學刻石寫經是為晉石經後魏孝明帝神龜元年祭酒崔光請補漢所立三字石經之殘缺此魏立也非漢唐文宗開成二年國子監九經石壁成從宰相領祭酒鄭覃之請也今尚在孟蜀廣政十四年鐫周易至宋仁宗皇祐元年公羊傳工畢是為石室十三經仁宗慶厯初命刻篆隸二體石經後僅孝經尚書論語畢工是為嘉祐石經高宗紹興間親書易詩左氏傳論

語孟子及禮記五篇刊石孝宗淳熙四年始建閣以覆之是為紹興御書石經蓋古來凡七刻矣與升菴所考迥異

跋周郡守晉祠碑亭記

二則

首論祀典釐正粹然經術之文也末及顧傳兩先生言又歐陽公集古錄趙明誠金石錄之流亞也至其文勢抑揚往復有壹唱三歎之遺亦非歐陽公固不足辨此也愚嘗妄以晉祠有三絕吾師此記為文絕曹侍郎紀遊

十二詠為詩絕傅先生大書晉源之栢第一章七字為書絕有此三絕然則晉祠之可堪共語殆不止貞觀片石而已也嗚呼此三絕者皆出於十數年之間何其盛歟豈非山靈之幸歟

吾師嘗謂愚曰聖母廟既正矣而此地臺駘廟亦不可不正蓋臺駘廟之在晉澤者即左傳所謂障大澤以處太原可以獨祀臺駘而此地則宜并及實沈今廟內雜祀有土地五通二神而不及實沈是有汾神而無參神

也是知有地理而不知有天文也豈可乎哉今亦不必
別興祠宇惟于廟內去土地五通二神而增一實沈象
而更其額曰臺駘實沈廟則允合於祀典矣蓋臺駘當
顓頊世實沈當帝堯世以世次為位次固不可以左傳
所序先後為拘也凡吾師之釐正祀典皆援經據義不
爽錙銖則其蒞政以來神和民安亦可概見於茲矣故
附記之

愚既跋吾師晉祠碑亭記訖復取縣志閱之見宣和五

年有姜仲謙晉祠謝雨文其首云致祭於顯靈昭濟聖母汾東王之祠中云惟聖母之發祥兮肇晉室而開基王有文之在手兮其神靈之可知為之狂喜欲絕益歎吾師之言信而有徵也女郎祠之建實始於天聖而封號之加則自熙寧禱應始宣和五年上距天聖甫百年其建祠之故與所祠之人必歷歷有據故仲謙得之於傳聞而載之於撰著不然豈牽合傳會遂至此也元人弋穀撰重修汾東王廟記亦云女郎祠建因改封汾東

王之後則其相因而及意有在矣乃祀典之譌實自洪武四年始詔革天下神祇封號止稱以山水本名而聖母廟遂改為晉源神祠若以聖母為真水神也者嗚呼不知此似是而實非也愚故詳考曲證以信吾師之說且以為他日作縣志者補焉

跋太上感應篇

右太上感應篇不知起自何時而唐宋經籍藝文志俱不載惟宋理宗命鄭清之作序自是始大行於世前代

儒者如高忠憲亦兩序其書抑聞之為惡或免於禍然
理無可為之惡為善或未蒙福然理無不可為之善此
主理言也天下孰有尊於理者哉竊以理即感得禍蒙
福斯應之矣蓋未有感而無應者樸園先生外現儒風
內修道行宜乎於此篇晨夕誦持不少懈獨歎余少曾
有志中遂蹉跎對此不覺汗流竟趾

跋賀黃公載酒園詩話

老友吳喬先生嘗言賀黃公載酒園詩話馮定遠鈍吟

雜錄及某園爐詩話可稱談詩者之三絕余急問賀書
何處有曰金陵有即託黃俞卽使者購之不半月以書
至同胡拙明細讀口眼俱快沁入心脾嘆吾老友之知
言也康熙庚午秋洞庭東山席氏館題

跋初刻唐百家詩選

余與宋次道同為三司判官時次道出其家藏唐詩百
餘編謗余擇其精者次道因名曰百家詩選廢日力於
此良可悔也雖然欲知唐詩者觀此足矣

右王荊公原序見集中者宋刻殘本失去余從集中取以冠卷端以見復荊公之舊云嘗聞前輩撰列朝詩集先採詩於白下從亡友黃俞邵及丁菡生輩借書每借輒荷數擔至前輩以人之書也不著筆又不用籤帖其上但以指甲掐其欲選者令小胥鈔胥奉命惟謹於掐痕侵他幅者亦並鈔後遂不復省視此與羣牧司吏遺籤置不取小詩上者何異古今事恆相類說者謂吏失之嬾胥失之勤其為失則一可發一笑也今閱殘本

八卷去取頗精足徵老眼無花則邵氏聞見錄云云疑
傳聞非實事而前輩指摺本余猶就俞邵家見之回憶
五十載前曾遇閩中書賈持翻刻本正二十卷啓中丞
公廣購之卒不可得五十載之事約如浮雲須臾變滅
豈惟書可勝慨歎雖然羽陵之蠹復完河東之亡再觀
安知今不有類於古為報中丞公且珍此以俟何如

補刻唐百家詩選序

今年中秋後三日大中丞宋公以賑荒舟過淮余以病


未往謁公手唐百家詩選全本授謁者曰子為我致百
詩作一序以賀余之遭彼序固有言珍此以俟俟焉果
得矣命竟未達豈委之於草莽乎抑謂我老耄而舍我
也既而有獻疑者曰吳下人好作偽紙非宋箋刻易而
為繕寫安知不復如楊公濟所為以博公之一笑乎余
獨以為不然公撫軍久吳人仰若神明非惟不可欺實
不忍欺凡事且然况書籍乎有試之之法在高棅見全
本以玄宗皇帝早度蒲關為開卷第一今其書合乎合

則真矣陳振孫見全本非惟不及李杜韓三家而王維
韋應物元白劉柳孟郊張籍皆不及倘闖入以上之一
首則不合合又真矣公觀詩之眼如月有隙斯昭苟出
近人假託譬衣布衲者必不能如前刻八卷一色之精
公固早辨及此而謂其不真可乎馬貴與著文獻通考
憾延壽史無志故南北日食多異同其父門下士李謹
思序按唐張太素叔姪撰魏志百卷天文尤備中州集
蔡珪補南北志六十卷今亡矣夫安得二志忽焉呈現

以為君書之助公茲殆有相之道耶雖然余更有請焉
者聞前輩云吳武陵太守謝承後漢書方從哲從史館
持去世遂不可得不知吾鄉陽曲縣張氏傅氏黃氏皆
有緣城破失去此永樂年間揚州刊本也安知世不更
有其書乎前輩苦求李燾續長編後於內閣抄卷初五
大本絳雲樓災遂成燼後數十年錫山人從嘉興高氏
購得建隆至治平者質諸前輩前輩曰吾焚香一瓣首
一叩始敢讀一版其欣賞如此安知世不更有熙寧後

以補足乎日纂志於洞庭徐司寇出典籍庫中大元大
一統志十數本皆蜀中地記尚有九百八十餘本曾見
葉文莊家書目此志與經世大典並列安知世不更有
足本乎又前輩慨唐會要不可見今復出吳草廬周禮
考註儀禮考註年譜且不載其目今復出太常因革禮
亡友吳志伊物也既失而復為司寇所收竊以以公之
力上所已出者或寫或刊以廣其傳上所未見者積誠
以求之寬歲月以待之如是則大有功於斯文不獨詩

已也余終始未見其全本漫以意序之如此云



潛邱劄記卷五